



**Nuup, Sisimiut, Ilulissat Qaqortullu avataatigut illoqarfiit mikinerit aningaasarsiornikkut ineriartornissaat pillugu, kommunit suleqatigalugit, pilersaarusiortoqarnissaa suliareqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut. Pilersaarusiaq kingusinnerpaamik UPA 2020-mi Inatsisartunut saqqummiunneqassaaq.**  
(Inatsisartunut ilaasortaq, Anders Olsen, Siumut)  
(Siullermeerneqarnera)

Demokraatiniik siunnersuuteqartoq nersualaarusupparput qulequtaq pingaarutilerujussuaq qaqqimmagu. Demokraatini qularinngilluinnarparput aningaasarsiornikkut imminut napatissinnaaneq politikikkullu namminersulivinnissaq anguneqarnaviangitsoq illoqarfiit ikittuaraannaat qimutsinnerisigut. Nunami innuttaasut tamarmik piginnaanitik atorlugit suleqataanermikkullu tamanna qularnaartussaavaat.

Erseqqissassavarput isumaqaratta immikkoortuni aalajangersimasuni, namminersorlutik inuutissarsiortut sapinngiffiini ingerlatserusuffiinilu, inuutissarsiornermik ingerlatsinissaq pisortat suliassarinnngikkaat. Aamma erseqqissarusupparput kissaatiginnginnatsigu pisortat suliffiutaat sumiiffinnut allanut nuunneqartassasut politikikkut iluareqqusaarneq piinnarlugu. Kingulleq inuiaqatigiittut misilittaqarfiginerloreerparput.

Taamaatulli oqareerluta qularutigineqassanngilluinnarpoq, Demokraatini inuutissarsiornernerup piorsarnissaa periarfissaqarluartutut isigigatsigu sumiiffinni nalinnaasumik taaneqartartuni illoqarfeeqqani nunaqarfinnilu. Tamatumunnga pissutigaarput sumiiffinni assigiinngitsuni inuutissarsiornernerup siuarsarneqarsinnaanera periarfissagissaaqimmat, ullumimut naleqqiullugu atorluarneqarnerusariaqartumik. Tassanerpiaq uangut politikerit pingaarutilimmik suliassaqarpugut eqqortunik sinaakkusersuinissaq eqqarsaatigalugu.

**Aningaasarsiornikkut ineriartornissap pisariaqartippaa namminersorlutik inuutissarsiortut nukittuut**

Siunnersuuteqartup kissaatigaa illoqarfiit mikinerit aningaasarsiornikkut ineriartornissaat pillugu pilersaarusiortoqassasoq. Demokraatini tamanna imatut paasivarput, qitiusumiit aalajangersarneqassasoq inoqarfinni assigiinngitsuni qanoq anguniagaqartoqassanersoq.

Tassunga akerliuvugut. Aningaasarsiornikkut ineriartornissaq pisortanit pilersinneqassanngilaq. Inuutissarsiortut namminersortut nukittuut, inuiaqatigiit sinaakkusiinerat tunngavigalugu



inuutissarsiornikkut periarfissat atorlugit siuariartorneq pilersittussaavaat, taamaasillutillu aningaasarsiornikkut ineriartorneq.

Pisortat qulangeeqqavallaqaat, taamaasillutillu aningaasaleerusussuseqarneq noqippaat. Tamannarpiaavoq uangut politikerit suliassarput allaangortillugulu. Tassani anguniartariaqarparput inuutissarsionerup sapinngisamik unammilleqatigiinnermik tunngaveqarnissaa, tassani namminersortut periarfissaqarlutik piviusumik unammilleqatigiinnermik pingaartitsinissaminnut.

### **Namminersorluni inuutissarsiortuuneq nukittussappat pisariaqarpoq pitsaasunik patajaatsunillu sinaakkuteqarnissaat**

Namminersorlutik inuutissarsiortut nukittuut pilersissagutsigit, pisariaqarpoq uangut politikerit pitsaasunik patajaatsunillu sinaakkutissanik pilersitsinissarput. Sinaakkutissat tunngaviusumik inatsisaapput patajaatsut ersarissullu. Tamatuma saniatigut sinaakkutit taaguutaapput imartuut, tunngaviusumilli pineqarpoq inuutissarsiortunut pitsaasunik atugassaqartitsinissaaq.

Inuutissarsiortunut assigiinngitsunut sinaakkutissat pitsaasut tassaasinnaapput, sulisartut pissarsiarineqarsinnaanissaat aamma piginnaasaqarluarnissaat, sulisartut inissaqartinneqarnissaat, pisortallu pisariaqartinneqartunik sulliviuteqarnissaat - soorlu meeqqerivinnik, atuarfinnik il.il.

Tamatuma saniatigut sinaakkutit pitsaasut tassaapput, nunap ataqatigiinnermut attaveqarfiisa pitsaasuunissaat. Tamakkununnga assersuutaasinnaapput aqquserngit, umiarsualiviit / talittarfiit, mittarfiit, nunaminertat (nunagissariikkat), IT aamma allanik teknikkikkut periarfissaqarnissaa, pisariaqartinneqartunik inuutissarsiummik ingerlatsinissamut.

Pingaartilillu oqaatigiuartariaqartoq tassaavoq pisortat namminersortullu akerleriissanngimmata, paarlattuanilli - imminnut pisariaqartittussapput. Isertorneqassanngilaq maani oqaluttarfinni massakut oqaaseqartutut isumaqarama, ullutsinni pisortat ingerlatsinerat qulangiisimavallaarujussuortoq, allaffissornikkut ingerlatsinermik pingaartitsivallaartoq eqarpallaarujussuortorlu. Imminut nunami maani innuttaasunut suliffeqarfinnullu kiffartuussisussatut isiginani, allanngilaq pisortat ingerlatsiviata suliassani paatsoorsimagai. Taamatut pissuseqartoqarnera sukanerpaamik allanngortittariaqarpoq, piviusunngortissinnaajumallugit nunatsinni inuutissarsiornikkut periarfissarpassuit.

### **Inatsisartut sinaakkusersuissapput - innuttaasut suliffeqarfiillu siuartortitsillutillu ineriartortitsissapput**

Asakka Inatsisartuni ilaasortat. Demokraatini isumaqarpugut nunami inatsisartut politikikkullu suleqatigiiffiit siviluallaamik imminnut inuutissarsiummik ingerlatsisutut assigisaatullu isigisimasut. Tamanna sukanerpaamik allanngortittariaqarparput, sinaakkutissanillu pilersitsilluta, kingornalu tatigalugit namminersorlutik inuutissarsiortut akisussaaffimminnik nammineq kivitsinnaasut.



Taamaaliorutta aningaasarsiornikkut imminut napatissinnaaneq - kingornalu politikkikkut namminersulivinnissaq tunngavississavarput.

Taamatut oqaaseqarluta siunnersuut itgartipparput.